

Regional News Unit AIR Aizawl  
Friday, November 15, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- DoNER Minister, Jyotiraditya M Scindia-a'n Prime Minister Narendra Modi-a kaihhruai sorkar hnuaiah hmarchhak state te sum dawn nasa takin a pung, a ti.
- Khualzinmite hip tura hmalak thin dan chu her danglama a tlem thei ang ber sorkar inrawlha mipui kuta a tam thei ang ber dah a nih tur thu Tourism Minister Pi Lalrinpuii'n a sawi.
- Deputy Speaker Pu Lalfamkima'n loneitute chu state sorkarin hmalakna lian ber atana a duan, Hand Holding policy thlawp tlat turin a sawm.
- President Droupadi Murmu-i chuan tribal mipuiten hma an sawn hunah chauh ramin hma a sawn ang a ti.



### DONER MINISTER IN MIZORAM

DoNER Minister, Jyotiraditya M Scindia-a'n Prime Minister Narendra Modi-a kaihhruai sorkar hnuaiah hmarchhak state te sum dawn nasa takin a pung, a ti.

DoNER Minister chuan hmarchhak state-te tana tunhmaa annual capital expenditure Cheng Vbch 27,000 dawn thin chu tunah chuan Cheng Vbch Nuai 1 leh Sang 5 dawn a ni tawh a, hei vang hian inkalpawhna lamah pawh nasa takin hmasawna a thleng a ni, a ti a. Mizoram kum 2004 atanga kum 2014 thlenga sorkar laipui atanga Cheng Vbch 4,734 a dawn laiin Pu Narendra Modi-a hnuaiah chuan kum 10 kal ta chhung khan Cheng Vbch 33,178 dâwnlai a dawng tih sawiin Financial Year 2024-25, kum khat chhung chauh pawhin Cheng Vbch 6,236 Mizoram a dawng, a ti a. Telecom lamah pawh hmasawna nasa tak a awm tih sawiin, Mizoram, Meghalaya leh Tripura tan Cheng Vbch 430 dah a nih thu leh he sum hi state pathuma 4G Network tihmasawn nan tangkai taka hman a nih dawn thu a sawi a ni.

Ministry of Development of North Eastern Region (DoNER)-in Mizorama hna a thawh hrang hrang Chief Minister Pu Lalduhoma sawipui turin DoNER Minister hi nimin khan Aizawl-ah rawn zin a. Chief Minister nen hun an hman zawha chanchinbumite a kawmnaah hmarchhak state ten nasa taka hma an sawn thu sawiin Mizoram thanna tur leh Mizoram hma a sawn nana hmahlir hrang hrang leh hna thawh mek te ngunthluk taka Chief Minister nena sawi dun a nih thu a sawi a. DoNER Ministry-in nasa taka Mizoram hmasawn nana hna a thawh thu sawiin niminah la la pawh khan an department atangin darkar 2 chuang Mizoram hmasawna tura thil pawimawh te an rawn sawi tih a sawi a ni.

Mizoram chuan khualzin hip kawngah te, ram ngaw leh nungcha lama hausaknaah te, infiamna te leh huan thlai neih kawngah te theihna nasa tak a nei a ni, a ti.

Chief Minister Pu Lalduhoma pawhin DoNER Minister chu Mizorama a kaihhruai sorkar ang chiaha kalphung thar duh a nih thu leh Ministry of DoNER a kaihhruai hnuah thil thar tha tak tak a tihchhuah hnem tawh thu a sawi ve bawk.

#### LEITLANGPUI MUSIC FEST

Khualzinmite hip tura hmalak thin dan chu her danglama a tlem thei ang ber sorkar inrawlha mipui kuta a tam thei ang ber dah a nih tur thu Tourism Minister Pi Lalrinpuii'n a sawi.

Mizoram sorkar buatsaih ni 3 awh tur Lengtlangpui Music Festival Lunglei Kawmzawla nimina a hawnaah he thu hi sawiin Tourism Minister chuan, tunhmaa sorkar Dept.-te'nn Kût chi hrang hrang an buatsaih thin chu mipuiin an ta neih lo thin a; tun tumah hian sorkar chu loh theih loha a inrawlh ngai mah se a huaihawt turin tender chhuahin mimal kutah dah a ni a, mipuiin an ta neih chu sorkar duhdan a ni, a ti a. Kum 1930 chho vela Serkawn Concert chu tih vul leh pahin huamzau zawkin Leitlangpui Music Festival chu buatsaih a ni, a ti.

Leitlangpui Music Festival hi ni 3 chhung hman tur a ni a, a hawn ni nimin chawhma lam khan Cultural item hrang hrang entir a ni a, chawhnu atangin zan thlengin concert a ni a. Vawiinah beat contest buatsaih a ni ang a, MLA te pawhin hun an hmanpui thin dawn a ni.



#### REVIEW MEETING WITH DONER MINISTER

Chief Minister Pu Lalduhoma leh DoNER Minister, Jyotiraditya M Scindia-a te kaihhruaiin nimin khan Ministry of Development of North Eastern Region (DoNER) kalflanga Mizorama hnathawh hrang hrangte thlirho a ni.

Chief Minister chuan DoNER kalflanga project kalpui meka harsatna awm leh rawtna a neih te, Mizoramin project thar a mamawhna lai te a tarlang a.

DoNER Minister chuan Chief Minister Pu Lalduhoma leh a pa te lo inthian thatna avangin Mizoram a ngainat thu leh an inlaichinna thinlung chu thawhhona tha zawk awmtirtua hman a duh thu a sawi a. Project endik ringawt tura lo kal a nih loh thu leh Mizoram an zirchianna leh hmasawn zel tura Mizoramin a mamawh rawtna tha tak tak rawn keng a nih zawk thu a sawi a. Mizoram chu khawchhak lama India chhuahka, hmun pawimawh taka awm a ni tih sawiin tihmasawn zel turin an inpeih tih a sawi a. An thutkhawm zarah hmasawna nghet leh khuarei daih Mizoramin a hmuh a, hmalam a pan zel theihna tur sawihona leh ruahmanna te neih an duh tih a sawi a. Project kal meka harsatna awm te chu a theih ang anga a lo bawhzui zel tur thu a sawi a ni.

DoNER Sr. Economic Adviser Dr. Mohamad Nazmuddin-a chuan DoNER Ministry-in hmasawna huang thenkhata Mizoram dinhmun tlangpui leh hmalak zelna tur rawtna a neihte a tarlang a. Chung an rawtnate behchhan chuan sawihona hun an hmang bawk a ni.



DY. SPEAKER

Deputy Speaker Pu Lalfamkima'n loneitute chu state sorkarin hmalakna lian ber atana a duan, Hand Holding policy thlawp flat turin a sawm.

Krishi Vigyan Kendra (KVK), Kolasib District-in KVK kum 50 tlin lawmna Golden Jubilee an hman kal zela Alu chi tha loneitute hnena semchhuah hun nimina a hmanpuinaah he thu hi sawiin Deputy Speaker chuan Hand Holding Policy hlawhtlinna chu loneitute kutah a a awm, a ti a; policy chungchang a hrilhfiah nghal bawk. Kolasib District chu buh leh bal thar kawngah theihna nei tha em em a nih laia huan enkawltu hnamdangten a hlawkna an tel tam zawk chu veiawm a tih thu sawiin Minister chuan thahnemngai taka loneitute tan hlawk zawka an hnathawhte hmang tangkai thei tura ngaihtuahna sen a pawimawh, a ti a. Sorkar puihna leh a van tla nghah ringawtah chuan hmasawna a awm theih loh thu sawiin tan la zual sauh turin kalkhawmte a fuih a ni.

Alu chi tha chi hi Central Potato Research Institute, Upper Shillong, Meghalaya atanga lak a ni. Hemi rual hian natna laka enkawlina tur damdawi sem chhuah nghal a ni a. Heng damdawi sem chhuah te hi National Research Center For Integrated Pest Management (NCIPM), New Delhi te rawn tum a ni.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.



#### JANJATIYA GAURAV DIVAS

Vawiin hi Janjatiya Gaurav Divas a ni a. He ni hi tribal zalenna sualtute hriatrengna atana Sawrkar laipui Cabinet-in November ni 10, kum 2021 khan India zalenna kum 75-na lawmna puala a ruat a ni.

President Droupadi Murmu-i chuan tribal mipuiten hma an sawn hunah chauh ramin hma a sawn ang a ti.

President chuan Janjatiya Gaurav Divas-ah thu a sawi a. Tribal mipuite hmasawn thuai thuaina tur chu ramin a enghelh a ni a ti a. Ram chuan kum zabi engemaw zata upa tawh tribal hnamte chu tawh danglam loh a duh a, chutih rual erawh chuan tunlai hmasawna mila hma lam pana ke an pen a ngai a ni a ti.

Tun sawrkar hian hmasawna zin kawngah tribal-te chu hmalam panin chak takin a hruai a ni a ti. An tan campaign leh programme chi tam tak kalpui thin a ni a. Ram pum huap hmasawna leh programme hrang hrangah tribal mipuite chu remchanna siamsak zel an ni a, tribal hnamte hamtharna tur special scheme-te pawh duansak an nih thu President chuan a sawi bawk a ni.

Prime Minister Narendra Modi-a pawhin Janjatiya Gaurav Divas pualin vawiin hian Bihar-ah Bhagwan Birsa Munda pianchampha phak vawi 150-na lawmnaah a kal dawn a. Chumi hriatrengna pawisa thir leh postal stamp a tlangzarh dawn a.

**Cheng Vbch sang 6 leh 640 hu senga hmun kirkhawr zawka tribal mipuite hmasawna tura hnathawh tur lungphum a phum dawn bawka ni.**

